

四庫全書

史部

欽定四庫全書

政和五禮新儀卷一百七十六

嘉禮

諸王以下昏儀

納采

問名

納吉

納成

請期

親迎

同牢

廟見

見舅姑

醴婦

盥饋

饗婦

舅饗送者

姑饗婦人送者

納采

前一日主人設賓次於大門之外

賓謂夫家之屬使往來者

道右南

向

非南向者各隨所向餘放此

其日大昕賓至女氏大門外掌次者

延入次

賓主及行事者皆公服不合公服者常服下准此

主人受於廟

無廟者於廳事

中間設神位

賓出次立於大門外之西東面主人立于東階

下西面賓者立于主人之左北受命出立于門東西面

曰敢請事賓曰某官以伉儷之重施某王

某官謂主人某王謂壻

某王率循彝典以將事敢請納采

某王謂壻父某謂賓

賓者入告

主人曰某之子弗閑于姆訓維是服脩棗栗之饋未知所以告虔也某聽命于廟敢不拜嘉賓者出告訖入引主人迎于大門之東西面主人揖賓賓報揖主人入門而右賓入門而左執鴈者從入以鴈陳于庭三分庭一在南北向

無鴈者聽用羔下准此

主人曰請吾子升賓曰某敢辭

主人升東階西面賓升西階東面賓曰敢納采主人西

面再拜訖賓降自西階以出

問名

賓既出立于中門之西東面主人降立于東階下西面
儐者進受命出請事賓曰合二姓之好必稽諸龜筮敢
請問名儐者入告主人曰某王恭慎重正昏禮將又加
諸卜某敢不以告儐者出告訖入引主人迎于中門外
之東西面主人揖賓賓報揖主人入門而右賓入門而
左執鴈者從入以鴈陳于庭三分庭一在南北面主人

升東階西面賓升西階東面曰敢問名主人西面再拜
訖進立于兩楹間西面賓進立于主人之西東面主人
曰某第幾女某氏出賓降自西階立于中門外之西東
面主人降立于中門內西面賓者進受命出請事賓曰
禮畢賓者入告主人曰吾子今以事至于某之室請禮
從者賓者出告訖賓曰某既得將事敢辭賓者入告主
人曰敢固以請賓者告訖賓曰某辭不獲聞命敢不從
賓者入告遂引主人升立于序端掌事者徹神位設禮

賓席饋者引主人降迎賓報揖主人入賓從入升階即座行飲食之禮會畢賓主俱興掌事者捧幣以授主人主人以授賓賓降自西階從者受幣賓退主人送於門外

納吉

前一日主人設賓次如常儀其日大昕賓至女氏大門外掌次者延入次主人受禮如納采之儀賓出次立于大門外之西東面主人立于東階下西面饋者進受命

出請事賓曰某王承嘉命稽諸卜筮龜策協從使某以告賓者入告主人曰某王不忘寒素欲施德於某未教之女而卜以吉告其曷敢辭儻者出告訖入引主人迎賓于大門外之東西面主人揖賓賓報揖主人入門而右賓入門而左執鴈者從入以鴈陳于庭三分庭一在南北向主人升東階西面賓升西階東面曰敢納吉主人西面再拜訖賓降自西階以出立于中門外之西東面主人降立于中門內西面儻者進受命出請事賓曰禮

畢其禮賓如問名之儀

納成

前一日主人設賓次如常儀其日大昕賓至女氏大門外掌次者延入次掌事者入設幕于中門之外玄纁束

帛陳于幕上

玄三疋纁二疋各束之其他禮物自如常儀

函書盛于箱置于

案主人受禮如納吉之儀賓出次立于大門之外西東

面主人立于東階下西面賓者進受命出請事賓曰某

官以伉儷之重施于某王

某王謂壻

某王率循彛典

某王謂壻父

有不腆之幣使某將事敢請納成主人曰某王順彝典
申之以備物某敢不重拜嘉賓者出告入引主人迎賓
于大門外之東西面主人揖賓賓報揖主人入門而右
賓入門而左舉函書案者從入奉束帛者次之諸持禮
物者皆從其後三分庭一在南北向西上主人升自東
階西面賓升自西階東面賓曰敢納成主人西面再拜
進立于兩楹間賓進立于主人之西相而立掌事者以
函書授賓賓執函書以授主人受以授掌事者訖賓降

自西階以出立于中門外之西東面主人降立于中門
內西面賓者進受命出請事實曰禮畢其禮賓如納吉
之儀

請期

前一日主人設賓次如常儀其日大昕賓至女氏大門
外掌次者延入次主人受禮如納成之儀賓出次立于
大門外之西東面主人立于東階下西面賓者進受命
出請事實曰某王慎重嘉禮將卜諸近日使某請期賓

者入告主人再辭賓者出告賓曰某既不獲受命於某
官某王得吉卜曰某日敢不以告賓者入告主人曰謹
奉命以從賓者出告訖引入引主人迎賓于大門外之東
西面主人揖賓賓報揖主人入門而右賓入門而左執
鴈者從入以鴈陳于庭三分庭一在南北向主人升東
階西面賓升西階東面曰敢告期某月日主人西面再
拜訖賓降自西階以出立于中門外之西東面主人降
立于中門內西面賓者進受命出請事賓曰禮畢其禮

賓如納成之儀

親迎

有故聽以
媒氏往迎

前一日主人設賓次如常儀其日大昕壻之父服其服

告於禰廟

無廟者廳事間設神位於
禮有不應設神位者不設

子將行父醺之於

廳事贊者設父位於中間南向設子位於父位之西近

南東向父即座子公服升自西階進立於位前贊者注

酒于醢西向授子子再拜跪受贊者又以饌設于位前

子舉酒興即座飲食訖降拜進立于父位前父命之曰

躬迎佳耦釐爾內治子再拜曰敢不奉命又再拜降出詣女氏家主人服其服告于禰廟如請期之儀賓將至

實謂壻

主人設神位于寢戶外之西又設醴女位于戶內南向具酒饌如常儀賓至贊禮者引就次女盛服立于房中就位南向立姆立于右從者陪其後父公服升自東階立于寢戶外之西東向內贊者設酒饌女就位坐飲食訖降再拜內贊者徹酒饌主人降立于東階東南西面贊禮者引賓出次立于門西東面賓者進受命出

請事賓曰某受命于父以茲嘉禮躬聽成命儻者入告
主人曰某固願從命儻者出告訖入引主人迎賓于大
門外之東西面主人揖賓賓報揖主人入門而右賓入
門而左執鴈者從入以鴈陳于庭三分庭一在南北向
主人升立于東階上西面賓升西階進當寢戶前北面
再拜降出主人不降送初賓入門母出立于寢戶外之
西南面于賓拜訖姆導出于母左父命之曰往之女家
以順為正无忘恭肅母戒之曰必恭必戒無違舅姑之

命庶母申之曰爾忱聽於訓言母作父母羞女出門壻

先還第

壻乘馬女乘牛車或擔子

同牢

初昏掌事者設巾洗各二一于東階東南一于室中之

北水在洗東尊于室中實四爵兩盞于篚

爵盞以常用酒器代之

婦至贊者引就北面立引壻揖婦入以及寢門又揖婦

升階入于室壻盥于南洗婦從者沃之婦盥于北洗壻

從者沃之贊者設酒饌七箸從設掌事者布對位壻揖

婦皆即座贊禮者二人俱注酒于醢以授壻及婦壻及婦俱興受醢即座飲訖贊者受虛醢遂薦饌再飲三飲如初儀壻及婦俱興再拜掌事者徹酒饌訖退

廟見

質明贊見婦于廟

無廟者于廳事中間設神位于禮有不應設神位者不用此儀

贊者

引主人位于東階下引主母位于西階下諸親子壻婦

各以序分立于後

非南向者各隨所向左右尊卑序立

立定贊者引婦進

詣庭中北面再拜訖復位主人升自東階詣諸神位前

上香祭酒再拜祝曰某氏來婦敢率以見主人降自西階復位贊者曰拜主人以下皆再拜訖退

見舅姑

其日婦服其服至寢門外贊者設舅姑位于堂上東西相向舅位于東姑位于西俟舅姑俱即座贊者引婦奉棗梔自寢門入立于庭再拜訖升自西階置于舅位前贊者進徹以東婦降階又再拜次又奉服修再拜訖婦從者執升自西階置于姑位前贊者受以東婦降階于階下

又再拜次醴婦如別儀

醴婦

見舅姑禮畢贊者設醴婦位于姑位之北少西東向婦升階立于位之西贊者注酒于醴詣婦位前西向立又贊者以饌設于位前婦拜拜受醴即座飲食畢降階再拜訖退

盥饋

贊者設舅姑位于堂上東西相向舅位于東姑位于西

俟舅姑俱即座贊者引婦立于庭各再拜訖升自西階
立于舅位之東西向贊者以饌授婦婦奉饌置於舅位
前贊者加以匕箸婦進立于姑位之西東向贊者以饌
授婦婦奉饌置于姑位前贊者加以匕箸舅姑俱食食
畢婦降階又再拜次饗婦如別儀

饗婦

盥饋舅姑禮畢贊者設饗婦位于姑位之北少西東向
婦升階徹饌設于位前贊者贊之加以匕箸婦再拜訖

卽座餞姑之饌食畢降階俱再拜訖退

舅饗送者

其日明主人命掌事者設賓次于大門之外又于廳事之兩楹間東北設主人位西北設賓位皆南向西東對設衆賓位賓至掌次者延入次僉者入告主人出迎贊禮者引賓出于大門外之西東面主人立于門東西面主人揖賓賓報揖主人入門而右賓入門而左主人升東階賓升西階東西相對各再拜訖賓主以下俱立于座

立定俱坐酒行如常會畢賓主俱興僎者引賓立于西階上東面主人立于東階上西面掌事者奉幣以授主人主人以授賓賓降自西階從者受幣賓退主人送于門外

姑饗婦人送者

其日內贊者設賓位于堂上兩楹間之西主人位于堂上兩楹間之東皆南向賓之親黨位于西面東向主人之親黨位于東南西向賓至僎者入告主人出迎內贊

政和五禮新儀卷一百七十六

欽定四庫全書

政和五禮新儀卷一百七十七

嘉禮

宗姬族姬嫁儀

納采

問名

納吉

納成

請期

親迎

同牢

廟見

見舅姑

醴婦

盥饋

饗婦

舅饗送者

姑饗婦人送者

納采

前一日主人設賓次于大門之外

賓謂夫家之屬使往來者

道右南

向

非南向者各隨所向餘放此

其日大昕賓至主人大門外掌次者

延入次

賓主及行事者皆公服不合公服者常服下准此

主人受于廟

無廟者於廳事

中間設神位于禮有不應設神位者不設下准此

賓出次立于大門外之西東

面主人立于東階下西面曰敢請事賓曰某王以伉儷

欽定四庫全書

品和五禮新儀
卷一百七十七

二

之重

某王謂主人非王
稱其官下准此

施某官之子某率循彛典以某

將事敢請納采賓者入告主人曰某聽命于廟敢不拜

嘉賓者出告訖入引主人迎于大門外之東西面主人

揖賓賓報揖主人入門而右賓入門而左執鴈者從入

以鴈陳于庭三分庭一在南北向

無鴈者聽用
羊下准此

主人曰

請吾子升賓曰某敢辭主人升東階西面賓升西階東

面賓曰敢納采主人西面再拜訖賓降自西階以出

問名

賓既出立于中門外之西東面主人降立于東階下西面賓者進受命出請事賓曰合二姓之好必稽諸龜筮敢請問名賓者入告主人曰某官恭慎重正昏禮將又加諸卜敢不以告賓者出告訖入引主人迎于中門外之東西面主人揖賓賓報揖主人入門而右賓入門而左執鴈者從入以鴈陳于庭三分庭一在南北向主人升東階西面賓升西階東面曰敢問名主人西面再拜訖進立于兩楹間西面賓進於主人之西東面主人曰

某第幾女宗姬

族姬即云族姬

賓降自西階出立于中門外之

西東面主人降立于中門內西面僎者進受命出請事
賓曰禮畢僎者入告主人延賓以飲食之會畢賓主俱
興掌事者奉幣以授主人主人以授賓賓降自西階從
者受幣賓退主人送于門外

納吉

前一日主人設賓次如常儀其日大昕賓至主人大門
外掌次者延入次主人受禮如納采之儀賓出次立于

大門外之西東面主人立于東階下西面賓者進受命
出請事償曰某官恭承嘉命龜筮協從使某以告主人
曰某官不忘厚貺而卜以告吉某不敢辭償者出告訖
入引主人迎賓于大門之東西面主人揖賓賓報揖主
人入門而右賓入門而左執鴈者從入以鴈陳于庭三
分庭一在南北向主人升東階西面賓升西階東面曰
敢告納吉主人西面再拜訖賓降自西階以出立于中
門外之西東面主人降立于中門內西面賓者進受命

出請事實曰禮畢其禮賓如問名之儀

納成

前一日主人設賓次如常儀其日大昕賓至主人大門外掌次者延入次掌事者入設幕于中門之外玄纁束

帛陳于幕上

玄三匹纁二匹合束之其他禮物自如常儀

函書盛于箱置于

案主人受禮如納吉之儀賓出次立于大門外之西東面主人于東階下西面僎者進受命出請事實曰某王以伉儷之重加惠某官之子某官率循彝典有不腆之

幣以某將事敢請納成儋者入告主人曰某官順彛典
申之以備物某敢不重拜嘉儋者出入引主人迎賓于
大門外之東西面主人揖賓賓報揖主人入門而右賓
入門而左舉函書者從之奉束帛者次之諸持禮物者
皆從其後三分庭一在南北向西上主人升自東階西
面賓升自西階東面賓曰敢納成主人西面再拜訖進
立于兩楹間賓進立于主人之西相向立掌事者以函
書授賓賓執函書以授主人主人受以授掌事者訖賓

降自西階出立于中門外之西東面主人降立于中門
內西面賓者進受命出請事賓曰禮畢其禮賓如納吉
之儀

請期

前一日主人設賓次如常儀其日大昕賓至主人大門
外掌次者延入次主人受禮如告成之儀賓出次立于
大門外之西東面主人立于東階下西面賓者進受命
出請事賓曰某官慎重嘉禮將卜諸近日使某請期主

人再辭賓曰某既不獲受命于某王某官得吉曰某日
敢不以告主人曰某謹奉命以從儻者出告訖入引主
人迎于大門外之東西面主人揖賓賓報揖主人入門
而右賓入門而左執鴈者從入以鴈陳于庭三分庭一
在南北向主人升東階西面賓升西階東面曰敢告期
某月日
甲子吉主人西面再拜訖賓降自西階以出立于中門
外之西東面主人降立于中門內西面儻者進受命出
請事賓曰禮畢其禮賓如納成之儀

親迎

有故聽以媒氏往迎

前一日主人設賓次如常儀其日大昕壻之父服其服

告于禰廟

無廟者于廳事東間設神位

子將行父醮之于廳事贊者

設父位于中間南向設子位于父位之西近東南向父

即座子公服升自西階進立于位前贊者注酒于醴西

向授子子再拜跪受贊者又以饌設于位前子舉酒興

即座飲食訖降再拜進立于父位前父命之曰躬迎進

耦釐爾內治子再拜曰敢不奉命又再拜降出詣女氏

家主人服其服告于禰廟如請期之儀賓將至

賓謂主壻

人設神位于寢戶外之西又設醴女位于戶內南向具酒饌如常儀賓至贊者引就次女盛服立于房中就位南向立姆立于右女從者陪後父公服升自東階立于寢戶外之東西向內贊者設酒饌女就位坐飲食訖降再拜內贊者徹酒饌主人降立于東階東南西面贊者引賓出次立于門西東面僨者進受命出請事實曰某受命于父以茲嘉禮恭聽成命僨者入告主人曰某固

願從命償者出告訖入引主人迎于大門外之東西面
主人揖賓賓報揖主人入門而右賓入門而左執鴈者
從入以鴈陳于庭三分庭一在南北向主人升立于東
階上西面賓升西階進當寢戶前北面再拜降出主人
不降送初賓入門母出立于寢戶外之西面于賓拜訖
姆導女出于母左父誡之曰往之女家以順為正無忘
肅恭母戒之曰必恭必戒無違舅姑之命庶母申之曰
爾忱聽于訓言母作父母羞女出門壻先還第

壻乘馬
女乘牛

車或
擔子

同牢

初昏掌事者設巾洗各二一于東階東南一于室之北
水在洗東尊于室中實于爵兩盞于籩

爵盞以常用
酒器代之

婦

至贊者引就北面立引壻揖婦以入及寢門又揖婦升
階入于室壻盥于南洗婦從者沃之婦盥于北洗壻從
者沃之贊者設酒饌七箸從設掌事者布對位壻揖婦
皆即座贊者二人俱注酒于醴授壻及婦皆興受醴即

座飲訖贊者受虛醴遂薦饌再飲三飲如初儀壻及婦俱興再拜掌事者徹酒饌訖退

廟見

贊明贊見婦于廟

無廟者于廳事中間設神位

贊者引主人立于東

階下引主婦立于西階下諸親與壻各以序分立于後

非南向者分左右各隨尊卑序立

立定贊者引婦進詣庭中北面再拜

訖復位主人升自東階詣神位前上香祭酒再拜祝曰某氏來歸敢率以見主人降自西階復位贊者曰拜主

人以下皆再拜訖退

見舅姑

其日婦服其服至寢門外贊者設舅姑位于堂上東西相向舅位于東姑位于西俟舅姑俱即座贊者引婦奉棗栗自寢門入立于庭再拜訖升自西階置于舅位前贊者進徹以東婦降階又再拜次又奉服脩再拜訖婦從者執俟于階下升自西階置于姑位前贊者受以東婦降階又再拜次醴婦如別儀

醴婦

見舅姑禮畢贊者設醴婦位于姑位之北少西東向婦升階立于位之西贊者注酒于醴詣婦位前西向立又贊者以饌設于位前婦再拜受醴即座飲食畢降階再拜訖退

盥饋

四品以下不用此儀

贊者設舅姑位于堂上東西相向舅位于東姑位于西俟舅姑俱即座贊者引婦立于庭各再拜訖升自西階

立于舅位之東西向贊者以饌授婦婦奉饌置于舅位
前贊者加以匕箸婦進立于姑位之西東向贊者以饌
授婦婦奉饌置于姑位前贊者加以匕箸舅姑俱食食
畢婦降階又再拜次享婦如別儀

享婦

四品以下
不用此儀

盥饋舅姑禮畢贊者設享婦位于姑位之北少西東向
婦升階徹饌設于位前贊者贊之加以匕箸婦再拜即
座餼姑之饌食畢降階俱再拜訖退

舅享送者

其日質明主人命掌事者設賓次于大門之外又設廳事之兩楹間東北設主人位西北設賓位皆南向東西對設衆賓位賓至掌次者引入次僎者入告主人出迎贊禮者引賓出立于大門外東面主人立于門東西面主人揖賓賓報揖主人入門而右賓入門而左主人升東階賓升西階東西相向對各再拜訖賓主以下俱立于座後立定俱坐定酒行如常會畢賓主俱興僎者引

賓立于西階上東面主人立于東階上西面掌事者奉幣以授主人主人以授賓賓降自西階從者受幣賓退主人送于門外

姑享婦人送者

其日明贊者設賓位于堂上兩楹間之西主人位于堂上兩楹間之東皆南向賓之親黨位于西南東向主人親黨位于東南西向賓至儗者入告主人出迎內贊者引賓主人衆賓從入至階俱升東西相對各再拜訖立

于坐後立定賓主以下俱坐酒行如常會畢賓主俱興
掌事者奉幣以授主人主人以授賓賓降自西階從者
受幣賓退主人送于門內賓出內贊者引主人入

政和五禮新儀卷一百七十七

欽定四庫全書

政和五禮新儀卷一百七十八

嘉禮

品官昏儀

納采

問名

納吉

納成

請期

親迎

同牢

廟見

見舅姑

醴婦

盥饋

饗婦

舅享送者

姑享婦人送者

納采

前一日主人設賓次于大門外

賓謂夫家之屬使往來者

道右南

向

非南向者各隨所向餘放此

其日大昕賓至女氏大門外掌次者

延入次

賓主及行事皆公服不合公服者常服下准此

主人受于廟

無廟者于廳事中問

設神位

賓出次立于大門外之西東面主人立于東階下

西面賓者立于主人之左北面受命出于門東西面曰

敢請事實曰某官以伉儷之重施于某

某官謂主
人某謂壻

某官

率循彝典

某官謂
壻父

以某將事敢請納采儻者入告主人

曰某之子弗閑于姆訓維是服脩棗栗之饋未知所以

告虔也其聽命于廟敢不拜嘉儻者出告訖入引主人

迎賓于門外之東西面主人揖賓賓報揖主人入門而

右賓入門而左執鴈者從入以鴈陳于庭三分庭一在

南北向

無鴈者聽用
羊餘准此

主人曰請吾子升賓曰某敢辭主

人升東階西面賓升西階東面賓曰敢納采主人西面

再拜訖賓降自西階以出

問名

賓既出立中門外之西東面主人降立于東階西面賓者進受命出請事賓曰合二姓之好必稽諸龜筮敢請問名賓者入告主人曰某官恭慎重正昏禮將又加諸卜某敢不以告賓者出告訖入引主人迎賓于中門外之東西面主人揖賓賓報揖主人入門而右賓入門而左執鴈者從入以鴈陳于庭三分庭一在南北向主人

升東階西面賓升西階東面曰敢問名主人西面再拜
訖立于兩楹間西面賓進立于主人之西東面主人曰
某第幾女某氏出賓降自西階出立于中門外之西東
面主人降立于中門內西面賓者進受命出請事賓曰
禮畢賓者入告主人曰吾子今以事至于某之室請禮
從者賓者出告賓曰某既得將事敢辭賓者入告主人
曰敢固以請賓者出告賓曰某辭不獲聞命敢不從賓
者入告主人升立于序端掌事者徹神位設主賓席贊

者引主人降迎賓報揖主人入賓從入升階卽座行飲
食之禮會畢賓主俱興掌事者奉幣以授主人主人以
授賓降自西階從者受幣賓退主人送于門外

納吉

前一日主人設賓次如常儀其日大昕賓至女氏大門
外掌次者延入次主人受禮如納采之儀賓出次立于
大門外之西東面主人立于東階下西面僮者進受命
出請事賓曰某官承嘉命稽諸卜筮龜筮協從使某以

告儻者入告主人曰某官惠顧前好欲施德于某未教之女而卜以吉告其曷敢辭儻者出告訖入引主人迎賓于大門外之東西面主人揖賓賓報揖主人入門而右賓入門而左執鴈者從入以鴈陳于庭三分庭一在南北向主人升東階西面賓升西階東面曰敢納吉主人西向再拜訖賓降自西階以出立于中門外之西東面主人降立于中門內西面儻者進受命出請事賓曰禮畢其禮如問名之儀

納成

前一日主人設賓次如常儀其日大昕賓至女氏大門外掌次者延入次掌事者入設幕于中門之外玄纁束

帛陳于幕上

玄三匹纁二疋合束之其他禮物自如常儀

函書盛于箱置于

案主人受禮如納吉之儀賓出次立于大門外之東西面主人立于東階下西面僎者進受命出請事賓曰某

官以伉儷之重加惠某官

上某官謂主人下某官謂壻

某官率循彛

典

某官謂壻父

有不腆之幣以某將事敢請納成主人曰某

官順彛典申之以備物某敢不重拜嘉賓者出告訖入引主人迎賓于大門外之東西面主人揖賓賓報揖主人入門而右賓入門而左舉函書案者從之奉束帛者次之持諸禮物者皆從其後三分庭一在南北向西上主人升自東階西面賓升自西階東面賓曰敢納成主人西面再拜進立于兩楹間賓進立于主人之西相向立掌事者以函書授賓賓執函書以授主人主人受以授掌事者訖賓降自西階以出立于中門外之西東面

主人降立于中門內西面僮者進受命出請事賓曰禮畢其禮如納吉之儀

請期

前一日主人設賓次如常儀其日大昕賓至女氏大門外掌次者延入次主人受禮如告成之儀賓出次立于大門外之西東面主人立于東階下西面僮者進受命出請事賓曰某官慎重嘉禮將卜諸近日使某請期僮者入告主人再辭僮者出告賓曰某既不獲受命于某

官某官得卜吉曰某日敢不以告儻者入告主人曰謹奉命以從儻者出告訖入引主人迎賓于大門外之東西面主人揖賓賓報揖主人入門而右賓入門而左執鴈者從入以鴈陳于庭三分庭一在南北向主人升東階西面賓升西階東面曰敢告

某月日
甲子吉

主人西面再拜

訖賓降自西階以出立于中門外之西東面主人降立于中門內西面儻者進受命出請事賓曰禮畢其禮賓

如納成之儀

親迎

有故則以
媒氏往迎

前一日主人設賓次如常儀其日大昕壻之父服其服

告于禰廟

無廟者于所市
東間設神位

子將行父醮之于廳事贊者

設父位于中間南向設子位于父位之西近南東向父
即座子公服升自西階進立于位前贊者注酒于醴西
向授子子再拜跪受贊者又以饌設于位前父命之曰
躬迎佳耦釐爾內治子再拜曰敢不奉命又再拜降出
詣女氏家主人服其服告于禰廟如請期之儀賓將至

賓謂壻

主人設神位于寢戶外之西又設醴婦位于戶內南向主人升東階西面賓升西階進當房戶前北面掌事者陳鴈于階賓曰某受命於父以茲嘉禮恭聽成命主人曰某固願從命賓再拜降出主人不降送初女出父戒之曰往之汝家無忘肅恭母戒之曰夙夜以思無有違命諸母申之曰無違爾父母之訓女出壻先還俟于門外

同牢

婦至贊者引就北面立壻南面揖以入至于室掌事者

設對位于室中壻婦皆即座贊者注酒于醴授壻及婦壻及婦受醴飲訖遂設饌再飲三飲並如上儀壻及婦興再拜贊者徹酒饌

見祖禰

質明婦服其服以俟見掌事者設神位如常儀贊者引主人位于東階下引主婦位于西階下諸親及壻婦各以序分立于後

非南向者各隨所向
分左右尊卑序立

立定贊者引婦進

詣庭中北面再拜訖復位主人升階詣神位前上香祭

金匱要略卷一百七十八
酒祝曰某氏來婦敢率以見祝訖降自西階復位主人
以下皆再拜訖退

見舅姑

贊者設舅姑位于堂上東西相向舅位于東姑位于西
俟舅姑俱即座贊者引婦奉棗栗立于庭再拜訖升階
置于舅位前贊者受之婦降階又再拜次又奉服脩再
拜訖服脩婦從者執俟于階下升階置于姑位前贊者受之婦降階
又再拜醴婦如別儀

醴婦

贊者設醴婦位于姑位之北少西東向婦升階立于位之西贊者注酒于醴授婦婦再拜受醴訖贊者又以饌設于位前婦即座飲食畢降階再拜訖退

盥饋

贊者設舅姑位于堂上東西相向舅位于東姑位于西俟舅姑俱即座贊者引婦立于庭各再拜訖升自西階立于舅位之東西向贊者以饌授婦婦奉饌置于舅位

前贊者加以匕箸婦進立于姑位之西贊者以饌授婦
婦奉饌置于姑位前贊者加以匕箸舅姑俱食畢婦降
階又再拜次享婦如別儀

饗婦

盥饋舅姑禮畢替者設享婦位于姑位之北少西東向
婦升階徹饌設于位前贊者贊之加以匕箸婦再拜即
座餽姑之饌食畢降階俱再拜訖即退

舅饗送者

其日質明主人命掌事者設賓次于大門之外又于廳事之兩楹間東北設主人位西北設賓位皆南向東西對設衆賓位賓至掌次者延入次僮者入告主人出迎贊禮者引賓出立于大門外之西東面主人立于門東西面主人揖賓賓報揖主人入門而右賓入門而左主人升東階賓升西階相對各再拜訖賓主以下俱立于座后俱坐定酒行如常會畢賓主俱興僮者引賓立于西階上東面主人立于東階上西面掌事者奉幣以授

主人主人以授賓賓降自西階從者受幣賓退主人送于門外

姑饗婦人送者

其日內贊者設賓位于堂上兩楹間之西主人位于堂上兩楹間之東皆南向賓之親黨位于西南東向主人之親黨位于東南西向賓至儗者入告主人出迎內贊者引賓主人衆賓從入至階俱升東西相對各再拜訖立于座后立定賓主以下俱坐酒行如常會畢賓主俱

興掌事者奉幣以授主人主人以授賓賓降自西階從
者受幣賓退主人送于門內賓出內贊者引主人入

政和五禮新儀卷一百七十八

欽定四庫全書

政和五禮新儀卷一百七十九

嘉禮

庶人昏儀

納采問名

納吉

納成請期

親迎

見祖禰

見舅姑

醴婦

饗送者

納采問名

其日媒氏至女氏門掌事者設禰位于廳事南向

非南向者

隨所向
餘放此

主人受禮于神位前迎媒氏于門外主人揖入

媒氏報揖從入主人升東階媒氏升西階

非東西階者
主人升左媒

氏升右
餘放此

對揖訖俱即座從者以鴈陳于階

三舍生無鴈
者並聽用羊

庶人聽以雉及
鳩鶩代下准此

媒氏曰吾子將修好于某某獲預將事

敢請納采主人曰某之子弗閑於姆訓敢不拜嘉媒氏

曰將加卜筮敢問名主人以函書授媒氏

稱某第幾
女年若干媒

氏將出主人曰敢禮從者媒氏曰敢辭主人曰敢固請

禮訖媒氏出主人送于門外

納吉

其日媒氏至女氏門掌事者設神位如初主人受禮如

納采之儀迎媒氏于門外主人揖入媒氏報揖從入主人升東階媒氏升西階對揖訖俱即座從者以鴈陳于階媒氏曰稽諸龜筮牧卜曰吉使某以告主人曰龜筮協從其曷敢辭餘如問名之儀

納成請期

其日媒氏至女氏門掌事者設神位如初主人受禮如納吉之儀迎媒氏于門外媒氏執函書主人揖入媒氏報揖從入持禮物者從其後

函書如常儀書其物之數
玄帛三纁帛二不及者臆

主人升東階媒氏升西階對揖訖俱卽座從者以禮物

陳于階媒氏曰吾子既修好于某某使某請納成

上某謂壻

父下某謂媒氏

媒氏以函書授主人主人曰備物者敢不重拜

主人復書以授媒氏媒氏復致命曰某使某請吉日主人曰某固聽命媒氏曰請以某甲子主人曰敢不承命餘如納吉禮

親迎

有故臚以媒氏往迎

質明掌事者設稱位于廳東間南向壻之父服其服北

面再拜祝曰某子某名年若干禮宜有室娉某氏第幾女以某日親迎敢告子將行父坐于廳事中間南向子

服其服

三舍生及品官子孫假九品餘並帛衫衣折上巾

立于父位之西少南

東向贊者注酒于醴授子子再拜跪受贊者又以饌設于位前子舉酒興即座飲食訖降再拜進立于父位前父命之曰釐爾內治往求爾匹子再拜曰敢不奉命又再拜訖降出初昏掌事者設酒及饌于室中置二醴于盤壻服其服

如前所服

至女氏家贊者引就次掌事者設壩

位主人受禮如請期之儀

主人謂女父

女盛服立于房中父

升階立于房外之東西向

非南向者各隨其所向立于門外之左餘倣此

贊者

注酒於醴授女女再拜受醴贊者又以饌設于位前女

即座飲酒訖降再拜父降立于東階下賓出次

賓謂壻

主

人迎于門揖賓入賓報揖從入主人及諸親與壻婦各

以次序分立于後

非南向者各隨所向分左右尊卑序立

立定贊者引婦

進詣庭中北面再拜訖復位主人升自東階詣神位前

上香祭酒再拜祝曰某子某

子名

聘某王第幾女宗姬

族姬

即云族姬

以某日來婦敢率以見主人降自西階復位贊者曰拜主人以下降階再拜訖退

見舅姑

其日婦服其服至寢門外贊者設舅姑位于堂上東西相向舅位于東姑位于西俱即座贊者引婦奉棗栗自寢門入立于庭再拜訖升自西階置于舅位前贊者進徹以東婦降階又再拜次又奉脩脩再拜訖

脩修婦從者執俟于

階下

升自西階置于姑位前贊受以東婦降階又再拜次

醴婦如別儀

醴婦

見舅姑禮畢贊禮者設醴婦位于姑位之北少西東向婦升階立于位之西贊者注酒于醴詣婦位前西向立又贊者以饌設於位前婦再拜受醴卽座飲食畢降階俱再拜訖退

饗送者

其日掌事者預于廳事對設主人及衆賓位賓至主人

降迎揖賓以入主人升東階賓升西階進詣兩楹間相對各再拜訖暨送者俱即座具酒饌如常儀會訖賓主俱興掌事者奉幣以授主人主人以授賓賓降自西階從者受幣賓退主人送于門外若女賓送者則主婦會于寢亦有幣餘如丈夫禮

政和五禮新儀卷一百七十九

欽定四庫全書

政和五禮新儀卷一百八十

嘉禮

皇太子冠儀上

奏告

陳設

皇帝御文德殿行禮

朝見皇后

謁太廟

謁別廟

皇帝受羣臣賀

羣臣上禮

皇帝會羣臣

奏告

前期太史局擇日差官奏告昊天上帝皇地祇太廟別廟太社太稷景靈東宮景靈西宮中太乙宮祐神觀醴

泉觀上清儲祥宮太清儲慶宮九成宮永安陵永熙陵
永定陵永昭陵永昌陵永厚陵永裕陵永泰陵並如常
告之儀

陳設

前期殿中監帥其屬尚舍張設垂拱文德殿門之內設
御座于文德殿當中南向東西房于御座之左右稍北
東西閣于殿後之左右殿上前楹施簾設香案於殿下
螭陛間又為房于東朶殿大晟展宮架之樂於殿庭橫

街之南設協律舉麾位于宮架西北東向大司樂押樂位於宮架之前北向儀鸞司設文武朝參官及掌冠贊冠掌冠以禮部尚書贊官以鴻臚卿應行禮官東宮官次于朝堂之內外

其日尚輦陳大輦于殿西階下東向列御馬於殿門外東廂西向尚書兵部帥其屬列黃麾細仗於殿庭典儀設皇太子朝見位于橫街南北向又設掌冠贊冠者受制位于皇太子位稍北東上又設左輔承制位于御座之東又設左輔宣制位于皇太子位之東北並西向又

設掌冠贊冠者及應行禮官位于東階下東宮官又位

于後並西向北上太常設皇太子冠席于東階下稍北

西向設褥位陳服于席南東領北上衮冕垂白珠九旋

紅絲組為纓青纁充耳犀簪導青衣朱裳九章

五章在衣山龍

華蟲火宗彛四章在裳藻粉米黼

白紗中單青標襜褕草帶塗金銀鉤

鰐鰓膝

隨裳色火山二章

瑜玉雙佩四采織成大綬間施二玉

環白韞朱履桓圭遠遊冠十八梁

金塗銀花飾

博山附蟬紅

絲組為纓犀簪導朱明服紅裳白紗中單方心曲領絳

紗蔽膝

餘同衮冕

白鞵黑烏折上中公服遠遊冠簪導衮冕

簪導同箱在服南設纍洗于阼階東纍在洗東篚在洗

西實巾一加勺冪光祿實側尊在席南饌設于席加冪

執事者並公服立于纍洗酒饌之所九旒冕遠遊冠折

上巾各一奉禮郎三人執以待于東階之東西面北

上設典儀位于宮架東北贊者二人在南少退俱西向

皇帝御文德殿行禮

其日質明闕文德殿門文武朝參官及掌冠贊冠應行

禮官東宮官入就次服朝服大樂正帥樂工先入就位
協律郎入就舉麾位大司樂入就押樂位典儀帥贊者
先入就位入引掌冠贊冠者入立于文德殿門外道東
西向東宮官以下自東宮導從皇太子至殿門外禮直
官通事舍人太常博士引皇太子詣文德殿東房訖
皇帝將出宮東上閤門引知樞密院事以下詣垂拱殿
立班如常儀東上閤門附內侍進班齊牌垂拱殿簾降
皇帝乘輦出至殿上少駐輦官迎駕自贊常起居宣輦

官上殿簾卷鳴鞭行門禁衛諸班親從迎駕自贊常起居次舍人先贊知內侍省官以下常起居次樞密以下通班常起居贊祇候引駕樞密知客省事以下至簽書東上閤門官分左右立六尚局應奉官祇候武功大夫以下並先退管軍臣僚窄衣執杖子宣名常起居贊祇候引駕並分左右前導輦降東階垂拱殿門外禁衛諸班親從自贊常起居訖至文德殿後管軍臣僚易公服執杖于殿階下分東西侍立皇帝降輦入西閤前導官

易朝服詣御座前分左右侍立知樞密院簽書樞密院知客省事以下至簽書東上閤門官在東同知樞密院在西閤門舍人以下各詣兩朶殿上不當祇應舍人並殿下西向立諸軍將校先入分立殿門內左右內外符寶郎俱詣閣奉迎御史臺引殿中侍御史一員先入就位次東上閤門御史臺太常寺分引三公以下文武百僚入詣文德殿立班東西相向如月朔視朝之儀禮直官通事舍人引左輔版奏中嚴內外符寶郎奉寶先出少

頃又引左輔版奏外辦皇帝服通天冠絳紗袍簾卷大樂正令撞黃鍾之鐘右五鐘皆應殿上鳴鞭禁衛諸班親從自贊常起居皇帝出西閣乘輦協律郎俛伏跪舉麾興

凡樂皆協律郎舉麾工鼓祝而後作偃麾戛鼓而后止

工鼓祝奏乾安之樂

禮直官太常博士引禮儀使前導皇帝出自西房內侍承旨索扇扇合皇帝降輦即御座簾卷內侍又贊扇扇開殿下鳴鞭戛鼓樂止爐煙升禮直官太常博士禮儀使立于御座前稍東西向符寶郎奉八寶陳于御座之

左右分立如儀禮直官通事舍人太常博士引掌冠贊冠者初入門肅安之樂作至位樂止立定典儀曰再拜贊者承傳在位官皆再拜左輔詣御座前承制降東階詣掌冠者前稍東西向稱有制典儀曰再拜贊者承傳在位官皆再拜訖左輔宣制曰皇太子冠命卿等行禮宣制訖掌冠贊冠者再拜左輔復位文臣侍從官宗室武臣節度使以上升殿分東西侍立禮直官通事舍人太常博士引掌冠贊冠者及應行禮官詣東階下位立

定東宮官入詣皇太子東房次禮直官通事舍人太常博士詣太子東房引皇太子內侍二人夾侍東宮官後

從

自後
准此

皇太子初行欽安之樂作即席西向坐樂止禮

直官通事舍人太常博士引掌冠贊冠者以次詣盥洗樂作搢笏盥手悅手訖執笏升樂止執折上巾者升掌冠者降一等受之右執項左執前進皇太子席前北向立祝曰咨爾元子肇冠於阼階筮日擇賓德成禮具於萬斯年成天之祐乃跪冠順安之樂作掌冠者興席南

北面立贊冠者進席前北面跪正冠興立于掌冠者之
後皇太子興內侍跪進服服訖樂止掌冠者揖皇太子
復坐禮直官通事舍人太常博士引掌冠贊冠者降詣
纁洗樂作搯笏盥手帨手訖執笏升樂止贊冠者進席
前北面跪脫折上巾置于篚興內侍跪受服興置于席
執遠遊冠者升掌冠者降二等受之右執頂左執前進
皇太子席前北向立祝曰爰即今辰申加玄服崇學以
齒三善皆得副于一人受天百福乃跪冠懿安之樂作

掌冠者興席南北面立贊者者進席前北面跪簪結紉
興立于掌冠者之後皇太子興內侍跪進服訖樂止
掌冠者揖皇太子復坐禮直官通事舍人太常博士引
掌冠贊冠者降詣罍洗樂作搯笏盥手悅手執笏升樂
止贊冠者進席前北向跪脫遠遊冠置于篚興內侍跪
受服置于席執袞冕者升掌冠者降三等受之右執項
左執前進皇太子席前北向立祝曰三加彌尊國本以
正無疆惟休有室大競懋昭厥德保茲永命乃跪冠成

安之樂作掌冠者興席南北面立贊冠者進席前北面
跪簪結紬興立于掌冠者之後皇太子興內侍跪進取
服服訖樂止禮直官通事舍人太常博士引皇太子降
自東階樂作由西階升即醴席南向坐樂止禮直官通
事舍人太常博士引掌冠者詣壘洗樂作搯笏盥手悅
手訖執笏升西階樂止贊冠者跪取爵內侍以酒注于
爵掌冠者受爵跪進皇太子席前北向立祝曰旨酒嘉
薦有飴其香拜受制文以定爾祥令德壽考日進無彊

皇太子搢圭跪受爵正安之樂作飲訖奠爵執圭太官
令奉饌設于皇太子席前皇太子搢圭食訖樂止執圭
興太官令徹饌及爵禮直官通事舍人太常博士引皇
太子降自西階詣朶殿東房易朝服皇太子初行樂作
至次樂止禮直官通事舍人太常博士引皇太子降立
于橫街南北向位東宮官復東階下西向位皇太子初
行樂作至位立定樂止禮直官通事舍人太常博士引掌
掌冠贊冠者詣皇太子位前稍東西向掌冠者少進字

之曰始生為名而實之賓既冠而字以益厥文永受保
之承天之慶奉勅字某太常博士請再拜皇太子再拜
訖搢笏舞蹈再拜奏聖躬萬福又再拜訖掌冠者贊冠
者復東階下位左輔詣御座前承旨降自東階詣皇太
子前稍東西向宣曰有勅太常博士請再拜皇太子再
拜左輔宣勅戒曰事親以孝接下以仁遠接近儀祿賢
使能古訓是式大猷是經宣訖左輔退復位太常博士
請再拜皇太子再拜訖禮直官通事舍人太常博士引

皇太子進前俛伏跪奏稱臣雖不敏敢不祇奉奏訖俛
伏興復位立太常博士請再拜皇太子再拜訖禮直官
通事舍人太常博士前引太子出殿門皇太子初行樂
作出門樂止文武侍從官以上武臣節度使以上及侍
立官並降復位立定典儀曰再拜贊者承傳在位官皆
再拜訖禮直官太常博士引禮儀使詣御座前俛伏跪
奏禮儀使具官臣某言禮畢俛伏興復位內傳承旨索
扇扇合簾降鳴鞭大樂正令撞蕤賓之鐘左五鐘皆應

乾安之樂作皇帝降座入自東房內侍入贊扇扇開樂止禮直官通事舍人引左輔版奏解嚴所司承旨放仗應在位官皆再拜訖以次出

朝見皇后

皇太子朝見皇帝訖入內朝見皇后如宮中之儀



政和五禮新儀卷一百八十

欽定四庫全書

史部

政和五禮新儀卷一百八十八至

詳校官編修_臣曹錫齡

編修_臣程嘉謨覆勘

總校官庶吉士_臣何思鈞

校對官主簿_臣汪日贊

謄錄監生_臣張鴻恕

欽定四庫全書

政和五禮新儀卷一百八十一

嘉禮

皇太子冠儀下

謁太廟

前期太常寺下太史局擇日謁廟前一日宮闈令帥其屬清掃廟之內外有司于廟東神門外道北南向設皇太子幄次又於殿庭東階下近東西向及遂室戶內各

設皇太子稱位又於幄次之南道東西並南極星門外設東宮官及應從官等次各量地之宜皇太子宿齋于本宮東宮官及應從官各宿于本寺

內執事官宿于奉廟

其日

質明東宮官應從官各服其服所司陳鹵簿於東宮門外禮直官引左庶子請內嚴右庶子負寶如式俱詣閣奏迎僕進金輅于閣外南向左內率執刀立于輅前北向中允一員在侍官之前贊者二人又在中允之前禮直官引左庶子言外備僕攝衣而升正立執轡皇太

子服遠遊冠朱明衣升輿以出左右侍衛如常儀左庶

子進詣輿前俛伏跪稱左庶子姓某言請皇太子降輿

升輅言訖俛伏

凡庶子有請並准此

皇太子降輿升輅僕立授綬

左庶子以下夾侍贊善進當輅前俛伏跪稱贊善姓某

言請進輅言訖俛伏興

凡贊善有請並准此

輅動贊善興贊者夾

引以出至侍官上馬所贊善請輅權駐令侍官上馬左

庶子前承令退稱曰令諸贊善退稱侍官上馬贊善承

傳文武侍官皆上馬左庶子以下夾侍于輅前侍官上

馬畢贊善請進輅輅動東宮官以下皆乘馬以從至太廟西櫺星門外迴輅南向禮直官引左庶子進當輅前請降輅皇太子降輅入幄次一刻頃禮直官引左庶子言外備皇太子服袞冕出次中允進圭皇太子執圭東宮導從如儀入詣殿庭東階之東西向位立定東宮官分立于左右禮直官引率更令請再拜皇太子再拜訖禮直官引率更令前導皇太子升自西階詣僖祖室神位前北向立率更令請再拜皇太子再拜訖次請翼祖

宣祖太祖太宗真宗仁宗英宗神宗哲宗室行禮如上
儀訖降西階復西向立位禮直官引率更令詣皇太子
前跪稱率更令姓某言禮畢言訖俛伏興前導皇太子
出東神門外中允少前受圭前引皇太子歸幄次更朝
服有司轉仗衛于還途如來儀僕進金輅於西櫺星門
外南向禮直官引左庶子言外備皇太子出次至西櫺
星門外升輅侍官上馬如來儀輅動至東宮所外俱下
馬入至閤前迴輅南向左庶子請降輅皇太子降輅升

卷一百八十一
與入侍官從至閤左庶子請將士各還本司

謁別廟

並如太廟之儀

皇帝受羣臣賀

其日質明文武百僚並常服早入就次皇帝將出宮讀
奏目官在殿庭之南宣贊引班對立舍人在其南簿書
官在舍人之西少絕覺察失儀提點使臣在其南並向
北

舍人以西為上簿
書官以下東為上

宣贊舍人立班前西向東上閤門

附內侍進班齊牌皇帝出宮守踏道行門禁衛諸班親

從迎駕自贊常起居訖又自贊賀再拜訖皇帝服鞞袍

坐鳴鞭讀奏目官以下起居訖

讀奏目官升降自東階

班首出班

致辭稱賀歸位再拜

如宣答又再拜

次知內侍省事以下管軍

臣僚各逐班先面西立俟班到橫行北向贊起居稱賀

並如上儀次行門起居稱賀再拜訖俟舍人南階下直

身奏班絕皇帝降座鳴鞭詣紫宸殿後幄排立諸班親

從迎駕自贊常起居初垂拱殿起居稱賀立班將畢樞

密以下大班入就位並如賀祥瑞立班之儀東上閤門
附內侍進班齊牌皇帝御紫宸殿坐鳴鞭舍人贊樞密
以下躬赴當殿通某官姓名以下起居稱贊復位贊樞密
以下再拜搢笏舞蹈又再拜班首奏聖躬萬福又再拜
訖班首出班致辭稱賀復位再拜搢笏舞蹈又再拜知
東上閤門官當殿北向承旨訖西向稱有制樞密以下
再拜宣答訖再拜搢笏舞蹈又再拜訖鳴鞭樞密直學
士自西階升殿侍立知東上閤門官以下殿庭東西侍

立餘官分班出

宣贊舍人退近南當庭中立對立舍人西出

文武百僚及諸

軍將校殿門外序班立定知東上閤門官以下退立東

階下次殿中侍御史一員先入就位次上將軍以下分

班入舍人分引文武班入詣殿庭東西相向立

將校排立不盡

者止殿門外立班

舍人揖班首以下躬宣贊舍人當殿通文武

百僚宰臣

三公通某官

姓名以下起居稱賀舍人揖班首以

下橫行北向

西省上將軍以下依舊位

並如賀祥瑞立班之儀宣贊

舍人揖左班進前舍人自班後詣東階下立知東上閤

門官至通唱位舍人揖班首以下躬知東上閣門贊拜
班首出班致辭稱賀復位樞密詣御座前承旨退詣折
檻東西向宣答班首以下再拜並如上儀訖知東上閣
門官揖宰相執政官升殿並自東階內中書侍郎升自西階樞密直學士下殿出
贊拜知東上閣門官還位引右班舍人由右班前出餘
官分出知引進司東上閣門官還侍立位宣贊舍人復
位次引進奉入如別儀

羣臣上禮

其日引進司先以所進馬陳列於殿門外北向東上俟羣臣稱賀禮畢宣贊對立舍人稍南相向立天武自西牽馬陳于殿庭三分庭一在南北首東上立定贊天武常起居訖

牽馬者不拜

門下侍郎于折檻東西向對舍

人當殿躬奏某官姓名以下進奉訖復對立位門下侍郎曰進奉出還侍立位天武應喏員僚引應奉從事側門出宣贊對立舍人復位合班躬奏閣門無事卷班西出皇帝降座鳴鞭還幄次知引進司官以下並卷班出

欽定四庫全書

明倫彙編
卷一百八十一

三省樞密院官並退舍人引應退奉官殿門外謝如常儀

皇帝會羣臣

前期殿中監帥其屬尚舍張設紫宸殿門之內設御座於殿上當中南向尚醞設御酒尊酒器於御座之東尚食設御茶牀於御座之西俱稍北有司設羣官酒尊酒器於殿下又設羣官座並如宴百官坐次之儀其日羣臣上禮畢俟諸司排當備御史臺分引三公以下文武

官以次入詣殿庭東西相向立東上閣門附內侍進班
齊牌皇帝出幄次鳴鞭先行門禁衛諸班親從迎駕奏
聖躬萬福訖皇帝即御座鳴鞭殿中監以下知同知入
內內侍省事知客省事以下知內侍省事以下帶御器
械官六尚局應奉官祇應武功大夫以下祇應諸司文
臣鬪班各奏聖躬萬福次管軍臣僚奏聖躬萬福各復
侍內祇應位次舍人引班首以下橫行北向並如宴百
官立班之儀班首奏聖躬萬福訖舍人贊各就坐再拜

舍人分班升殿席前相向立朵殿兩廊官立于席後教坊使以下通班大起居看戲人謝升殿再拜訖內侍進御茶牀殿侍酌酒訖知東上閤門官詣御座前躬奏班首姓名以下進酒舍人分引殿上臣僚橫行北向贊再拜舍人引班首稍前知東上閤門官接引詣御座東北向搢笏殿中少監以酒注于醴班首奉酒詣御座前躬進訖少退虛跪興以盤授殿中監出笏知東上閤門官引退舍人接引復位贊再拜舍人引班首少前殿上臣

僚席前相向立知東上閤門官接引班首詣御座東北
向搢笏殿中監受盤捧詣御座前西向立樂作皇帝飲
訖舍人分引殿上臣僚橫行北向知東上閤門官引班
首接盞訖少退虛跪興授殿中監出笏引退舍人接引
復位贊再拜舍人贊各賜酒羣官俱再拜贊就位羣官
俱立席後復贊就座羣官俱坐酒初行羣官搢笏受酒
先宰臣次百官皆作樂尚食典御奉御進御食太官設羣
官食

後准

皇帝再舉酒

自此並殿中
監少監進酒

羣官俱立席後樂

作飲訖舍人贊就座復行羣官酒皇帝三舉酒次行羣官酒並如第二之儀若宣示醴即隨所向東上閤門官以下揖稱宣示醴躬贊就座若宣勸即立席後躬飲訖贊再拜內侍舉御茶牀舍人引班首以下俱降階橫行北向再拜搢笏舞蹈又再拜分班出次教坊使以下謝祇應再拜訖如賜祇應臣僚茶酒並舍人逐班贊再拜知東上閤門官側奏無事皇帝降座鳴鞭

政和五禮新儀卷一百八十一

欽定四庫全書

政和五禮新儀卷一百八十二

嘉禮

皇子冠儀

奏告

陳設

皇帝御文德殿行禮

朝見皇后

奏告

前期太史局擇日差官奏告景靈東宮景靈西宮如常告之儀

陳設

前期殿中監帥其屬尚舍張設垂拱殿文德殿門之內設御座于文德殿當中南向東西房于御座之左右稍北東西間於殿後之左右殿上前楹施簾設香于殿下螭陛間又為房于東朶殿大晟展宮架之樂于殿庭橫街

之南設協律郎舉麾位於宮架西北東向大司樂押樂
位于宮架之前北向儀鸞司設文武朝叅官及掌冠贊

冠

掌冠以太常卿贊冠以閤門官

應行禮官王府官次朝堂之內外其

日尚輦陳大輦于殿西階下東向列御馬於殿門外東
廂西向尚書兵部帥其屬列黃麾細仗于殿庭次典儀
設皇子朝見位于橫街南北向設掌冠贊冠者受制位
于皇子稍北東上設左輔承制位于御座之東設左輔
宣制位于皇子位之東並西向又設掌冠贊冠者及應

行禮官位于東階下王府官又位于後並西向北上太
常設皇子冠席于東階上稍北南向設褥席陳服于席
南東領北上九旒冕

旒以青
琪為之

犀簪導青纊充耳青衣朱

裳九章白羅中單青標襖裾革帶鉤釵大帶蔽膝玉佩
暈錦綬間施二玉環朱韉朱履七梁冠金鍍銀梁貂蟬
籠巾犀簪銀立筆排羅大袖裙白羅中單皂襖白羅方
心曲領緋羅蔽膝緋白羅大帶銀褐綾勒帛間金鍍銀
束帶間金鍍銀裝玉佩錦綾青絲網玉環白綾韉馬

皮履折上巾公服七梁冠贊導九旒冕簪導同箱
在服南設罍洗于阼階東罍在洗東篚在洗西實巾
一加勺罍光祿實側尊在席南饌設于席加罍執事者
並公服立于罍洗酒饌之所九旒冕七梁冠折上巾各
一篚奉禮郎三人執以侍于東階之東西向北上設典
儀位于樂架東北贊者二人在南少退俱西向

皇帝御文德殿行禮

其日質明闕文德殿門文武朝參官及掌冠贊冠應行

禮官王府官就次服朝服大樂正帥樂工先入就位協律郎入就舉麾位大司樂入就押樂位典儀帥贊者先入就位又引掌冠贊冠者入立于文德殿門外道東西向王府官以下自本閣導從皇子至殿門外禮直官通事舍人太常博士引皇子詣文德殿東房訖皇帝降出宮東上閤門引知樞密院事以下詣垂拱殿立班如常儀東上閤門附內侍進班齊牌垂拱殿簾降皇帝乘輦至殿上少駐輦官迎駕自贊常起居訖宣輦官上殿簾卷

鳴鞭行門禁衛諸班親從迎駕自贊常起居次舍人先贊知內侍省官以下起居次樞密以下通班常起居贊祇候引駕樞密知客省事以下至簽書東上閤門官分左右立六尚應奉官祇應武功大夫以下並先退管軍臣僚窄衣執杖子宣名常起居贊祇候引駕並分左右前導輦降東階垂拱殿門外禁衛諸班親從自贊常起居訖至文德殿後管軍臣僚易公服執杖于殿階下分東西侍立皇帝降輦入西閤前導官易朝服詣御座前

分東西侍立知樞密院簽書樞密知客省事以下知簽書東上閣門官在東同知樞密院在西閣門舍人以下各詣兩朶殿上不當祇應舍人並殿下西向立諸軍將校先入分立殿門內左右內外符寶郎俱詣閣奉迎御史臺引殿中侍御史先入就位次東上閣門御史臺太常寺分引三公以下文武臣僚入詣文德殿立班東西相向如月朔視朝之儀禮直官通事舍人引左輔版奏中嚴內外符寶郎奉寶先出少頃又引左輔版奏外辦

皇帝服通天冠絳紗袍簾卷大樂正令撞黃鍾之鍾左

五鐘皆應殿上鳴鞭禁衛諸班親從自贊常起居皇帝

出西閣門乘輦協律郎跪俛伏舉麾興

凡樂皆協律郎舉麾工鼓祝而

後作偃麾戛鼓而後止

工鼓祝奏乾安之樂禮直官太常博引禮

儀使前導皇帝出自西房內侍承旨索扇扇合皇帝降

輦即御座簾卷內侍贊扇扇開殿下鳴鞭戛鼓樂止爐

煙升禮直官太常博士禮儀使立于御座前稍東西向

符寶郎奉八寶陳于御座之左右分立如儀禮直官通

事舍人太常博士引掌冠贊冠者入就位掌冠者初入
門抵安之樂作至位樂止立定典儀曰再拜贊者承傳
在位官皆再拜左輔詣御座前承制降自東階詣掌冠
者前稍東西向稱有制典儀曰再拜贊者承傳在位官
皆再拜訖左輔宣制曰皇子冠命卿等行禮宣制訖掌
冠贊冠者再拜左輔復位文臣侍從官宗室武臣節度
使以上升殿東西侍立禮直官通事舍人太常博士引
掌冠贊冠者及應行禮官以次詣東階下位立定王府

官入詣皇子東房引皇子內侍二人夾侍王府官後從

自後
准此

皇子初行恭安之樂作即席南向坐樂止禮直官

通事舍人太常博士引掌冠贊冠者以次詣盥洗樂作
搯笏盥手帨手訖執笏升樂止執折上巾者升掌冠者
降一等受之右執項左執前進皇子席前北向跪冠修
好之樂作掌冠者興席南北面立贊冠者進席前北向
跪正冠立于掌冠之後皇子興內侍跪進服訖樂止掌
冠者揖皇子復坐贊冠者跪取爵內侍以酒注于爵跪

進皇子席前北向立祝曰酒醴和旨籩豆靜嘉授爾玄服兄弟具來永言保之降福孔皆皇子搢笏跪受爵翼安之樂作飲訖奠爵執笏太官令奉饌設于皇子席前皇子搢笏食訖樂止執笏太官令徹饌禮直官通事舍人太常博士引掌冠贊冠者降詣盥洗樂作搢笏盥手悅手訖執笏升樂止贊冠者進席前北向跪脫折上巾置于篋興內侍跪受服興置于席執七梁冠者升掌冠者降二等受之右執項左執前進皇子席前北向跪冠

進安之樂作掌冠者興席南北面立贊冠者進席前北面跪簪結紘興立于掌冠者之後皇子興內侍跪進服服訖樂止掌冠者揖皇子復坐贊冠者跪取爵內侍以酒注于爵掌冠者受爵跪進皇子席前北向立祝曰賓贊既戒殽核維旅申加厥服禮儀有序允觀爾成承天之祐皇子搢笏跪受爵輔安之樂作飲訖奠爵執笏太官令奉饌設于皇子席前皇子搢笏食訖樂止執笏太官令徹饌禮直官通事舍人太常博士引掌冠贊冠者

降詣罍洗樂作搯笏盥手悅手訖執笏升樂止贊冠者
進席前北向跪脫七梁冠置于篋興內侍跪受服興置
于席執九旒冕者升掌冠者降三等受之右執項左執
前進皇子席前北向跪冠慶安之樂作掌冠者興席南
北面立贊冠者進席前北面跪簪結紘興立于掌冠之
後皇子興內侍跪進服服訖樂止掌冠者揖皇子復位
贊冠者跪取爵內侍以酒注于爵掌冠者受爵跪進皇
子席前北向立祝曰旨酒嘉栗甘薦令芳三加爾服眉

壽無疆永承天休俾熾而昌皇子搢笏跪受爵賢安之
樂作飲訖奠爵執笏太官令奉饌設于皇子席前皇子
搢笏食訖樂止執笏興太官令徹饌禮直官通事舍人
太常博士降引皇子降自東階詣朵殿東房易朝服皇
子初行樂作至次樂止禮直官通事舍人太常博士
引皇子降立于橫街南北向位王府官復東階下西向
位皇子初行樂作至位立定樂止禮直官通事舍人太
常博士引掌冠贊冠者詣皇子位前稍東西向掌冠者

少進字之曰歲日云吉威儀孔時昭告厥字君子攸宜
順爾成德永受保之奉勅字某太常博士請再拜皇子
再拜訖搢笏舞蹈再拜奏聖躬萬福又再拜訖掌冠者
復東階下位立左輔詣御座前承旨降自東階詣皇子
前稍東西向宣曰有勅太常博士請再拜皇子再拜
左輔宣勅戒曰好禮樂善服儒講藝蕃我王室交于兄
弟不溢不驕惟以守之宣訖左輔退復位太常博士請
再拜皇子再拜訖禮直官通事舍人太常博士引皇子

進前俛伏跪奏稱臣雖不敏敢不祇奉奏訖俛伏興復
位太常博士請再拜皇子再拜訖禮直官通事舍人太
常博士前引皇子出殿門皇子初行樂作出門樂止文
臣侍從官以上武臣節度使以上及侍立官並降復位
立定典儀曰再拜贊者承傳在位官皆再拜訖禮直官
太常博士引禮儀使詣御座前俛伏跪奏禮儀使
具官臣某言禮畢俛伏興復位內侍承旨索扇扇合
簾降鳴鞭大樂正令撞蕤賓之鐘右五鐘皆應乾安之

樂作皇帝降座入東房內侍又贊扇扇開樂止禮直官
通事舍人引左輔版奏解嚴所司承旨浼伏應在位官
俱再拜訖以次出次日文武百僚詣閣門拜表稱賀如
常儀

朝見皇后

皇子朝見皇帝訖入內朝見皇后如宮中之儀

政和五禮新儀卷一百八十二

欽定四庫全書

政和五禮新儀卷一百八十三

嘉禮

品官嫡子冠儀

告廟

戒賓

宿賓

行事

禮賓

告廟

將冠主人諏日擇賓告于禰廟無廟者為位于廳事兩楹之間南面主人公服再拜乃告曰某子某年若干矣卜某甲子冠吉賓某官某贊某官某不泯先君之嗣徽福於我先君實辱臨之以始卒冠事謹告

凡行事如非南向並各因

所向陳設以後准此

戒賓

前三日主人戒賓賓如主人服出門立西面肅而入賓
入門而左主人入門而右賓升東階主人升西階主人
再拜賓答拜主人曰某之子某將以某日加冠於其首
願吾子終教之賓曰某不敏恐不能共事以病吾子敢
辭主人曰某猶願吾子終教之也賓曰吾子重有命某
敢不從主人再拜賓答拜主人退賓退于門外

宿賓

前一日主人擇賓可使冠子者一人而宿之如戒賓之

儀宿曰某將加冠于子某之首願吾子將蒞之敢宿賓
對曰某敢不宿興宿贊冠者亦如之

賓贊善主人有故以書戒宿

行事

賁明執事者設洗于東階東南水在洗東箱實巾一在
洗西陳服于房中東領北上

無房者張帷為之

平冕金鍍鉤石

稜角簪青羅素裙蔽膝白綬中單緋白羅大帶金鍍銅

華草帶緋羅履襪

五品以上五旒冕青生色大袍緋羅繡裙蔽膝皂綬銅環餘同平冕服

三梁冠朝服金鍍銀稜角簪銀立筆緋羅大袖裙白紗

中單皐襖白羅方心曲領緋羅蔽膝緋白羅大帶銀褐
綬勒帛金鍍銅束帶佩方勝練鵲錦綬青絲網鍤石環
五品以上四梁羅金鍍銀稜犀簪束帶銀佩族四盤賜錦綬餘同二梁冠折上中公服巾總

二梁冠平冕笄組紃實于篋平冕二梁冠折上巾各一
箱執以待于西隅南面東上賓升則東面設洗于房中
之東水在洗東箱實巾一在洗西質明主人公服立于
東階下西面兄弟各服其服立于洗東西面北上將冠
者立于房中南面賓贊如主人服立于外門之外主人

出迎揖先入三揖至于階三遜設主人位于東階上西面賓贊位於西階上東面主人以賓升就位贊冠者盥于洗西升立于房中西面設冠位于主人東北西面將冠者出房南面贊冠者奠巾總于席南端賓揖將冠者即席坐贊冠者坐設巾總賓降主人從降賓辭請勿降主人曰吾子降辱敢不從降賓既盥一揖一遜升主人復初位賓即將冠者席前跪正巾興降西階一等執折上巾者升東面授賓賓右手執項左手執前進揖冠

者席前東向立祝曰粵惟初冠考禮之稱正爾容體順
爾辭令盡革童心永膺天慶乃跪冠興復位贊冠者跪
正折上中冠者興賓揖冠者適房服折上中服出房南面立
賓主俱興賓揖冠者即席坐贊冠者跪脫折上中設筭
賓降主人從降辭對如初賓既盥揖遜升賓即冠者席
前跪正中興降西階二等執二梁冠者升東面授賓賓
右手執項左手執前進冠者席前東向立祝曰載契我
龜載加爾服爾既順遂母曰欲速自天申之申以百福乃

跪冠興復位贊冠者卒紘冠者興賓揖冠者適房服

梁二

冠服

出房南面立賓主俱興賓揖冠者即席坐贊冠者跪

脫二梁冠設筭賓降主人從降辭對如初賓既盥揖遜

升賓即冠者席前跪正巾興降西階三等執平冕者升

東西授賓賓右手執項左手執前進冠者席前東向立

祝曰授時之吉迎天之休抗以高明掖其進修三加彌

尊百祿是適乃跪冠興復位贊冠者卒紘冠者興賓揖

冠者適房服

平冕服

出房南面立賓主俱興執事者徹折

上中二梁冠席入于房執事者布席于西階上南面設酒饌如常儀執事者盥手洗爵于房中贊冠者以酒注於爵賓揖冠者即席西南面立賓受爵進席前北向立祝曰旨酒既載嘉肴斯阜既曰克家亦惟繼祖孝友慈祥受天之祐冠者席西拜受爵賓東面答拜贊冠者薦饌贊冠者即座坐飲食訖降席再拜賓答拜易服拜父父為起入拜母母為起賓降當西序東面主人降當東序西面立冠者出立于西階東南面賓少進字之曰卜

筮云吉禮儀孔明爰字爾德嘉爾有成其成伊何曰伯

某甫

仲叔季唯其所當

冠者曰某雖不敏敢不祇奉賓出主人

西面詣賓曰吾子辱執事請禮從者賓曰某既得將事

敢辭主人曰敢固以請賓曰某辭不得命敢不從賓就

次如別儀冠者廟見及見諸父諸兄姑姊如常儀

若以巾帽

折上中為三加者聽

禮賓

冠訖主人釋服改席賓與贊冠者如主人服出次立于

門西東面主人出門東西面主人揖賓先入賓及贊冠者從之至階揖遜升各即席衆賓皆與執事者奉幣酬賓會訖賓主俱興主人再拜賓答拜賓出主人送于門

外

孤子冠即諸父諸兄為主如上儀
品官子孫三舍生冠依品官儀

政和五禮新儀卷一百八十三

欽定四庫全書

政和五禮新儀卷一百八十四

嘉禮

品官庶子冠儀

告廟

戒賓

宿賓

行事

禮賓

告廟

如嫡子之儀

戒賓

如嫡子之儀

宿賓

如嫡子之儀

行事

質明執事者設洗於東階東南水在洗東篚實巾一在

洗西陳服房中東領北上

無房者張帷為之

平冕金鍍鉤石稜

角簪青羅素大袖緋羅素裙蔽膝白綾中單緋白羅大

帶金鍍銅革帶緋羅履襪

五品以上五旒冕青羅生色大袖緋羅綉裙蔽膝白綾

銅環餘同平冕服

二梁冠朝服金鍍銀稜角簪銀立筆緋羅大

袖裙白紗中單阜襖白羅方心曲領緋羅蔽膝緋白羅

大帶銀褐綾勒白金鍍銅束帶佩方勝練鵲錦綬青絲

網輸石環

五品以上四梁冠金鍍銀稜角簪銀束帶銀佩簇四盤鵲錦綬餘同二梁冠服也

折上

巾公服巾總二梁冠笄組紃實于篋平冕二梁折上巾
各一箱執以待于西隅南面東上賓升則東面升洗于
房中之東水在洗東簾實巾一在洗西質明主人公服
立于東階下西面兄弟各服其服立于洗東西面北上
將冠者立于房中南面賓贊如主人服立于外門之
外主人出迎揖先入三揖至于階三遜設主人之位于
東階西面賓贊位于西階上東面主人與賓升就位贊
冠者盥手洗西升立于房中西面設冠者位于房戶外之

西南面設酒饌如常儀將冠者出房南面贊冠者奠巾
總于席東端賓揖將冠者即席座贊冠者坐設巾總賓
降主人從降賓辭請毋降主人曰吾子降辱敢不從降
賓既盥一揖一遜升主人復初位賓即將冠者席前跪正
巾興降西階一等執折上巾者升東階西面授賓賓右手
執項左手執前進將冠者席前北向跪冠興復位贊冠
者跪正折上巾冠者興賓揖遜冠者適房服折上出房
南面立賓主俱興賓揖冠者即席坐執事者盥手洗爵

于房中贊冠者以酒注于爵賓受爵進席前北向立祝
曰穀旦既治言設其醴助爾成德治此嘉禮既醺于初
昭受多祉冠者再拜受爵賓東面答拜贊冠者薦饌冠
者即座坐飲食訖降席再拜賓答拜賓揖冠者即席坐
贊冠者跪脫折上巾設筭賓降主人從降辭對如初賓既
盥揖遜升賓即冠者席前正巾興降西階二等執二梁
冠者升東階西面授賓賓右手執項左手執前進冠者
席前北向跪冠興復位贊冠者跪卒紘冠者興賓揖訖

冠者適房服

二梁冠服

出房南向立賓主俱興賓揖冠者即

席立執事者盥手洗爵于房中贊冠者以酒注于爵賓受爵進席前北向立祝曰有脯斯設有酒斯盈載加爾服聿觀其成革爾幼習保茲令名冠者再拜受爵賓東面答再拜贊冠者薦饌冠者即席坐飲食訖降席再拜賓答拜賓揖冠者即席坐贊冠者跪脫二梁冠設筭賓降主人從降辭對如初賓既盥揖遜升賓即冠者席前正中興降西階三等執平冕者升東階西面授賓賓右

手執項左手執前進冠者席前北向跪冠興復位贊冠者跪卒紘冠者興賓揖冠者適房服

平冕服

出房南面立

賓主俱興賓揖冠者即席立執事者盥手洗爵于房中贊冠者以酒注于爵賓受爵進席前北向立祝曰旨酒思柔穀核維旅受言醺之三加具舉爾德既成有秩斯祜冠者再拜受爵賓東面答拜贊冠者薦饌冠者即席坐飲食訖降席再拜賓答拜執事者徹冠席酒饌及折上巾二梁冠入于房中冠者易服拜父父為起入拜母

母為起賓降當西序東面主人降當東序西面立冠者
出立於西階東南面賓少進字之曰卜筮云吉禮儀孔
明爰字爾德嘉爾有成其成伊何曰孟某甫冠者曰某
雖不敏敢不祇奉賓出主人西面請賓曰吾子辱執事
請禮從者賓曰某既得將事敢辭主人曰敢固以請賓
曰某辭不得命敢不從賓就次如別儀冠者廟見及見
諸父諸兄姑姊如常儀

若以巾帽折上
中為三加者聽

禮賓

如嫡子之儀

孫子冠即諸父諸兄為主如上儀品官子
三舍生冠依品官之儀折上巾服用綠

政和五禮新儀卷一百八十四

欽定四庫全書

政和五禮新儀卷一百八十五

嘉禮

庶人嫡子冠儀

告禰

行事

告禰

將冠主人諏日擇賓告于禰為位于廳事南面主人北

面再拜乃告曰某子某年若干矣卜以某甲子冠吉乃

速賓某以始卒冠事庶幾臨之謹告

凡廳事如非南向並各因所向陳設

以後
准此

行事

前期主人戒賓曰某日將加冠於子某首願吾子泣之

賓許諾其日夙興張帷為房於廳事之東陳服其中

謂每

加所易
之服

東領北上酒饌在服北帽一折上巾一陳于西

階之兩為賓主位如常儀為冠者席于主人東少北西

向將冠者待于房中賓至主人出迎揖而入坐定冠者
出自房執事者曰請行事主人曰敢勞吾子賓揖將冠
者即席坐執帽者升賓降受之進冠者席前東向立祝
曰令月吉日始加首服棄爾幼志茂爾成德俾壽而臧
以介多福乃跪加帽興復位賓揖冠者適房易服出即
冠席復坐賓跪脫帽執折上巾者升賓降受之進冠者
席前東向立祝曰吉月令辰申加爾服欽爾威儀柔嘉
維則壽考不忘以終厥德乃跪冠興復位賓揖冠者適

房執事者徹冠箱冠席入于帷中為醴席于西階南向
冠者易服出賓主俱興執事者以酒注於醴賓揖冠者
即醴席西向立賓受醴進席前北向立祝曰爾酒既滑
爾肴伊旅拜受祭之自求多祐冠者席西拜受賓答拜
執事者薦饌于席前冠者坐飲食訖再拜賓答拜冠者
興離席立于東階之西東南向賓少進字之曰爾服既
莊爾儀既備兄弟偕止爰告爾字永保受之令德是似
冠者拜賓答拜冠者廟見如常儀拜父父為起入拜母

母為起拜諸父羣從之尊者主人享賓出主人送于門

外

孤子冠即諸父諸兄為主如上
儀戒賓若主人有故聽以函書

政和五禮新儀卷一百八十五